

光緒山西通志

仕寶錄二

錄六之二

山西通志弟百四十六

賜進士出身頭品頂戴兵部侍郎兼都察院右副都御史巡撫山西提督軍務臣張煦奉

旨監修

南朝

宋齊

隋

唐

五代

王元謨字彥德太原祁人六世祖宏河東太守綿竹侯祖牢徙青州父秀早卒元謨幼而不羣世父蕤有知人鑒常曰此兒氣槩高亮有太尉彥雲之風宋武臨徐州辟為從事史與語異之元嘉中補長沙王義欣鎮軍中兵將軍領汝陰太守每陳北伐之策上嘉之後為金紫光祿大夫領太常與柳元景等受顧命時朝政多闕元謨以嚴直不容徙青冀二州刺史加都督明帝即位禮遇甚優以元謨為大都領水軍南討以脚疾聽乘輿出入大將軍江州刺史副司徒頃之為左光

祿大夫開府儀同三司領護軍遷南豫州刺史加都督年八十一卒諡曰莊子深早卒子纘嗣

右南朝宋一人

王元邈字彥遠太原祁人元謨弟仕宋位青州刺史昇明中齊高帝引爲驍騎司馬再遷秦州刺史建元初李烏奴作亂元邈出奇兵破之高帝聞之曰元邈果不負吾建武中卒於護軍贈雍州刺史諡曰壯侯

柳世隆字彥緒河東解人元景弟子也父叔宗子雙隣位建威參軍事早卒世隆幼自立雖世肖獨修布衣業長好讀書音吐溫潤元景愛賞之言於宋孝武得召見上曰此兒將來復是三公一人爲西陽王撫軍法曹行參軍出爲武威將軍上庸太守上謂元景曰卿昔以武威爲隨郡今復授世隆使

卿門世不乏公也元景被禍得免後爲太子洗馬與張緒王延之沈琰爲君子交累遷晉熙王安西司馬加甯朔將軍時齊武帝爲長史與世隆甚懽武帝將下都高帝書曰汝旣入朝當須文武兼資人委以後事世隆其人也武帝乃舉世隆自代轉武陵王前軍長史江夏內史行郢州事昇明元年冬沈攸之遣孫同劉攘兵王靈秀等分兵出夏口據魯山攸之住白螺洲晝夜攻戰世隆隨宜拒應衆皆披卻攸之已死徵爲侍中仍遷尙書右僕射封貞陽縣侯出爲吳郡太守居母憂寒不衣絮齊初起南豫州刺史加都督進爵公上手詔褚淵甚優美之淵曰世隆在危盡忠居憂杖而後起立人之本二理同極加榮增寵足以敦厲風俗建元二年授右僕射不拜起借祕閣書給二千卷三年出爲南兖州刺史加都督武

帝初加散騎常侍遷護軍世隆性情廉介盛事墳典張緒問
曰君當以清名遺子孫邪荅曰一身之外亦復何須子孫不
才將爲爭府如其才也不如一經光祿大夫韋祖征州里宿
德世隆每爲之拜人或勸祖征止之荅曰司馬公爲後生楷
法吾豈能止之後授尙書左僕射以本官總督伐蠻衆軍仍
爲湘州刺史加都督至鎮以方略討平之復入爲尙書左僕
射不拜轉尙書令世隆少立功名晚專以談義自業不干世
務垂簾鼓琴風韻清遠甚獲世譽以疾遜位拜左光祿大夫
侍中永明九年卒給東園祕器贈司空班劬二十人謚曰忠
武著龜經祕要二卷行于世長子悅字文殊少有清致位中
書郎早卒謚曰恭

右南朝齊二人

王茂字休連一字茂先太原祁人祖深北中郎司馬父天生
宋列將尅司徒袁粲以勳厯齊郡守封上黃縣男茂年數歲
大父深異之常曰此吾家千里駒成門戶者必此兒也及長
好讀兵書究大指性隱不交游身長八尺潔白美容儀齊武
帝見之曰年少堂堂必至公輔後爲臺郎不調求邊職爲雍
州長史襄陽太守梁武事無大小皆詢之人或譖茂異圖遣
視其甲稍則蟲網焉乃殺譖者梁武發雍郿茂爲前驅郿魯
平從東下爲軍鋒師次秣陵齊大將王珍國盛兵朱雀門衆
號三十萬及戰梁武軍引卻茂下馬單刀直前外甥韋欣慶
勇力絕人執鐵纏稍翼茂而進大破之茂勳第一建康平爲
護軍將軍遷侍中領軍將軍梁武帝將留潘玉兒茂曰亡齊
者此物留之恐貽外議乃出之以余妃賜茂亦潘之亞也羣

盜燒禮虎門茂率所領應赴躍馬而進盜反走加鎮軍將軍
封望蔡縣公出爲江州刺史南討陳伯之伯之奔魏茂務農
省役百姓安之四年西禦魏師於漢中班師厯侍中中衛將
軍太子詹事車騎將軍開府儀同三司丹陽尹進司空茂性
寬厚吏人安之居處方正在一室衣冠儼然雖僕妾莫見其
情容委表瓊麗鬚眉如畫爲衆所瞻望徙驃騎將軍開府同
三司之儀江州刺史不取俸獄無滯囚被服同儒素卒於州
贈太尉諡曰忠烈子貞秀嗣

王神念太原祁人少好儒術尤明內典仕魏潁川太守與子
僧辨據郡歸梁封南城縣侯厯安成武陽宣城內史皆著政
績後爲青冀二州刺史神念性剛正所更州郡必禁止淫祠
青州東北石鹿山先有神廟祈禱糜費神念令毀撤風俗遂

改後徵爲右衛將軍卒官諡曰壯追贈侍中中書令改諡忠公神念少善騎射及老不衰嘗於武帝前手執二刀盾左右交度馭馬往來冠絕羣伍長子遵業太僕卿

孫伯翳康子初梁武帝爲司徒與范雲善後雲佐帝起兵將至都先以軍迎伯翳伯翳曰蕭征東以濟世雄武挾天子令諸侯天時人事甯侯多說雲曰此正會吾心今羽翮未備不得不就羈籠楹希足下聽之位終驃騎將軍

柳橙字文深世隆子好元言通老易梁武至姑孰候接小郊與諸人同憩逆旅食俱去行里餘命左右燒逆旅舍以絕後追當時服其善斷厯給事黃門侍郎與琅邪王峻齊名俱爲中庶子時人號爲方玉後爲鎮北始興王長史移鎮益州復請橙上曰柳橙風標才氣恐不能久爲少王臣王堅請爲鎮

西長蜀郡太守涖政廉恪益部懷之

柳忱字文若世隆子年數歲父及母閭氏竝疾忱不解帶經年及居喪以毀聞仕齊西中郎主簿勸長史蕭穎胄同武帝爲甯朔將軍累遷侍中郢州平頴胄議遷都夏口忱以巴峽未賓不宜輕捨根本搖動人心俄而巴東兵至峽口遷都議乃息論者以爲見機梁初封州陵伯歷五兵尚書祕書監散騎常侍改給事中光祿大夫卒謚穆忱與兄惔惔惔三兩年間四人迭爲侍中復居方伯當世罕比子範嗣

柳慶遠字文和河東解人元景弟子也父叔珍義陽內史慶遠仕齊魏興太守郡暴水欲移杞城慶遠曰吾聞江河長不過三日命築土而已俄水退百姓服之後爲襄陽令林惔薦之于梁武帝武帝曰文和吾已知之辟爲別駕慶遠謂所親

曰定霸者其吾君乎盡誠協贊及起兵常居帷幄爲謀主從軍東下身先士卒武帝行營見慶遠頓舍嚴整每嘆曰人人若是吾又何憂建康平爲侍中帶淮陵齊昌二郡太守城內嘗夜火武帝歛諸門籥悉付慶遠其見任如此霸府建爲從事中郎梁初封重安侯位散騎常侍改封雲杜出爲雍州刺史加都督上餞於新亭曰卿衣錦還鄉朕無西顧憂矣始武帝爲雍州慶遠爲別駕謂曰昔羊公語劉宏卿後當居吾處今相觀亦復如是曾未十年而慶遠督府談者以爲逾於魏詠之累遷侍中領軍將軍給扶出爲雍州刺史慶遠重爲本州厲清節士庶懷之卒官贈開府儀同二司謚曰忠惠喪還上親出臨之其寵眷如此子津字元舉性强直厯散騎常侍太子詹事襲雲杜侯太清三年卒津子仲禮勇力兼人少有

山陰通志卷一百四十一 仁實金二
王
膽氣爲簡文帝雍州長史遷電威將軍封陽泉縣侯中大通
中西魏將賀拔勝逼樊鄧出擊破之除黃門郎遷司州刺史
侯景濟江與諸藩赴援見推總督景素聞其名甚憚之仲禮
亦自謂當世英雄諸將莫已若也與景戰於青塘大破之仲
禮稍將及景而賊將支伯仁自後再斫仲禮中肩馬陷淖賊
聚稍刺之騎將郭山石救之以免自此壯氣外衰不復言戰
及臺城陷開營降旣而景遷仲禮西上至江陵湘東王以爲
雍州刺史襲襄陽與魏將楊忠戰滌頭大敗并弟子禮沒於

魏

裴之高字如山河東聞喜人遂兄中散大夫髦之子也少負
意氣常隨遂征討立功遂器重之戎政咸委焉壽陽之役遂
卒於軍之高隸夏侯夔平壽陽除梁郡太守封都城縣男汝

陰來附救應接之除潁州刺史父憂起爲光遠將軍平陰陵盜爲譙州刺史遷西豫州刺史率衆援臺城南豫州刺史鄱陽王範命總督江右援軍諸軍事頓張公洲柳仲禮至橫江遣船舸迎致與韋粲等俱會青塘及臺城陷還合肥與範西上元帝召爲侍中護軍將軍時之高弟之悌在侯景中或傳斬景上使報之高竟無言直云賊自殺賊非之高所聞上深嗟其介直除特進金紫光祿大夫卒謚曰恭

裴之平字如原之高弟少倜儻有志略以軍功封費縣侯承聖中累遷散騎常侍太子詹事陳文帝初除光祿大夫慈訓宮衛尉竝不就築山穿池植卉木有終焉志卒謚曰儻

右南朝梁八人

王慶字興慶太原祁人父因魏靈州刺史懷德縣公慶少開

悟有才略復宏農破沙苑並有戰功大統十年授殿中將軍
周初晉公護引爲典籤慶樞機明辨漸見親待授大都督武
成元年賜爵始安縣男二年行小賓部保定二年使吐谷渾
與分疆其主悅服遣所親隨慶貢獻初突厥與周和親許納
女爲后而貪齊人重賂復許之授慶左武伯副楊薦爲使是
歲遂興入并之役慶引突厥騎與隋公楊忠至太原而還及
齊人通和突厥復致疑阻又遣慶往諭之結好如初五年復
與宇文貴逆女自此以慶信著北蕃頻歲出使屬可汗暴殂
突厥令慶釐面慶抗辭不從卒不敢通武帝聞而嘉之錄前
後使功遷開府儀同三司兵部中大夫進爵公歷丹中二州
刺史爲政嚴肅吏不敢犯大象元年授小司徒加上大將軍
總管汾石二州五鎮諸軍事汾州刺史又除延州總管進柱

國開皇元年進平昌郡公卒於鎮贈上柱國諡曰莊子淹嗣
郭榮字長榮太原人父徽魏大統末同州司馬時楊忠爲刺
史由是與隋高祖有舊徵官至洵州刺史安城縣公隋初拜
太僕卿卒官榮容貌魁岸外疎內密人多愛之周大象宰宇
文護以榮謹厚引爲親信擢中外府水曹參軍請於汾州姚
襄鎮間更築一城俄而齊將段孝先攻陷二城唯榮所立者
獨全又督便水者引取齊大筏浮橋獲全以功授大都督使
綏集稽胡榮於上郡延安築周昌宏信廣安招遠咸甯等五
城以遏要路稽胡由是不能爲寇拜宣納中士後從平齊以
戰功賜馬二十四匹綿絹六百段封平陽縣男遷司水大夫及
高祖總百揆拜相府樂曹參軍復領藩部大夫隋初引爲內
史舍人進蒲城郡公加上儀同累遷通州刺史仁壽初引領

西南八州諸軍事行軍總管率兵討夷獠歲餘悉平賜奴婢三百餘口大業初入爲武侯驃騎將軍以嚴正聞後數歲黔安首領田羅駒阻清江作亂夷陵諸郡民夷多應者詔榮擊平之遷左候衛將軍從征吐谷渾拜銀青光祿大夫征高麗以功進左光祿大夫嘗諫曰臣聞千鈞之弩不爲鼷鼠發機豈有親辱大駕以臨小寇不納榮親蒙矢石晝夜不釋甲冑百餘日上每勞勉之九年上許授一郡榮不願違離頓首陳讓拜右候衛大將軍後數日上謂百寮曰誠心純至如郭榮者固無比矣其見信如此楊元感亂令馳守太原明年復從至柳城遇疾存問動靜中使相望卒於懷遠鎮年六十八朝贈兵部尙書諡恭贈物千段有子福善

爾朱敞字乾羅北秀容人父彥伯誅敞小隨母養於宮中年

十二自賣走至大街見童兒羣戲做解所著綺羅金翠服易衣而遁追騎至執綺衣兒比究問知非會日暮免遂入一村見長孫氏媪踞胡牀坐做再拜哀求長孫氏愍之藏復壁中購愈急長孫氏資而遣之遂爲道士變姓名隱嵩高山路涉經史嘗獨坐巖石下泣然歎曰吾豈終此乎伍子胥獨何人也乃奔長安周文帝見而禮之拜行臺郎中靈壽縣伯保定中遷開府儀同三司天和中厯信臨熊瀆四州刺史進爵爲公武帝東征上表求從所當皆破爲護軍大將軍轉膠州刺史迎長孫氏至家厚資給之隋初改封邊城郡公命討平黔安蠻叛拜金州總管政號嚴明吏人懼之後以老賜二馬輅車歸河內卒子最嗣

以上太原府

郭衍字彥文太原介休人父以舍人從魏孝武入關官至侍

中衍少驍武善騎射周陳王純引爲左右累遷大都督募人於天水得樂徙千餘家屯陝城拜使持節車騎大將軍儀同三司率所領禦寇一歲數告捷齊人懾服王益任之建德中議伐齊衍請爲前鋒攻河陰城授儀同大將軍武帝圍晉州慮齊兵來授令衍從陳王守千里徑又從大戰於晉州追齊師至高壁敗之從平并州以功授開府封武強縣公邑一千二百戶賜姓叱羅氏宣政元年爲右中軍熊渠中大夫從韋孝寬戰於武陟進相州尉遲迥敗衍入據濟州城擊餘黨於濟北累戰破之報送京師起授上柱國封武山郡公開皇元年敕復舊姓爲行軍總管屯平涼數歲突厥不入徵爲開漕渠大監部率水工鑿渠引渭水經大興城北東至潼關漕運四百餘里關內賴之名曰富民渠五年授瀛州刺史大水親

備船楫并齎糧拯救民多獲濟衍先開倉賑卹後始開奏上大善之選授朔州總管所部恒安鎮選沃饒地置屯田又築桑乾鎮十年從晉王廣出鎮揚州命爲總管領精銳萬人先屯京口戰於貴洲南敗之生擒魁帥獲舟楫糧儲進討東陽永嘉宣城歟欽諸洞盡平之授蔣州刺史遷洪州總管晉王暉衍及入爲太子徵授左監門率轉左宗衛率漢王起兵使衍馳還總兵居守大業元年拜左武衛大將軍幸江都令統左軍改授光祿大夫又從討吐谷渾出金山道納降二萬餘戶初封爵例除六年封正定侯卒贈左衛大將軍贈賜甚厚諡襄長子臻虎牙郎將次子嗣本孝昌縣令

以上汾州府

賈熾字光成扶風平陵人後漢大鴻臚章之後章子統靈帝時鴈門太守避竇武之難奔匈奴爲部落大人後魏南徙子

孫因家代賜姓紇豆陵武累世仕魏皆至大官父略平遠將
軍以熾著勲贈少保柱國大將軍建昌公熾性嚴明有謀略
美鬚髯身長八尺二寸少從范陽祁忻受毛詩左氏春秋通
大義善騎射膂力過人正光末隨略避地定州投葛榮榮破
熾乃將家隨爾朱榮於并州時葛榮別帥韓婁等據薊城熾
從驃騎將軍侯深討之手斬婁以功拜揚烈將軍孝武卽位
蠕蠕等諸蕃竝遣使朝貢帝臨軒宴之有鴟飛鳴殿前帝欲
矜示遠人給熾御箭兩隻命射之應弦而落諸蕃咸歎異焉
尋隨東南道行臺樊子鵠追尔朱仲遠時梁主遣元樹入寇
據譙城子鵠令熾擊破之封行唐縣子進爵上洛縣伯帝與
齊神武構隙以熾有威重拜閭內大都督遷朱衣直閭從帝
西遷仍與其兄善敗武衛將軍高金龍於千秋門因入宮城

取御馬四十四并鞍勒進之行所帝大悅賜熾及善駿馬各二匹鴛馬十四大統元年別封正定縣公從周文禽寶泰復宏農破沙苑皆有功河橋之戰諸將退走熾獨從兩騎爲敵人追至芒山熾乃下馬背山抗之敵衆漸多矢下如雨熾騎士所執弓竝爲敵人所射破熾乃總收其箭以射之所中人馬應弦而倒敵稍引退突圍出又從太保李弼討白額稽胡破之高仲密以北豫州來赴熾從周文援之至洛陽會東魏人據芒山爲陣周文率輕騎奪擊熾獨追至石濟而還大統十三年出爲涇州刺史蒞職數年政號清靜改封安武縣公廢帝元年除原州刺史抑挫豪右申理幽滯在州十載甚有政績州城北有泉水熾屢經游踐嘗與僚吏宴於泉側及去職至此泉者莫不懷之恭帝元年進爵廣武郡公蠕蠕寇廣

武熾度河至魏伏川大破之武成二年拜柱國大將軍保定
元年進封鄧國公天和五年自太宗伯左遷宜州刺史晉公
護誅徵拜太傅熾既朝之元老名望素隆軍國大謀常與參
議嘗有疾周武幸其第問之帝謀伐齊熾年已衰老扼腕曰
臣雖朽邁請執干櫓帝壯其志節以熾二子武當公恭爲左
二軍總管齊平進位上柱國隋文輔政尉遲迥舉兵熾移入
金墉與洛州刺史平涼公元亨同心固守權行洛陽鎮事相
州平熾入朝文帝初爲相國百寮勸進自以累世受恩不肯
署賤人高其節文帝踐極拜太傅加殊禮贊拜不名開皇四
年八月薨年七十八贈八州諸軍冀州刺史謚曰恭熾事親
孝奉諸兄以悌順聞位望隆重子孫皆處列位爲當時盛族
子茂嗣茂有弟十三人恭威最知名恭位至大將軍從周武

平齊封贊國公除西兗州總管熾兄善以中軍六都督南城
公從魏孝武西遷仕至太僕衛尉卿汾北華瀛三州刺史驟
騎大將軍開府儀同三司永富縣公謚曰忠子榮定嗣
寶榮定善子沈深有器容貌魁偉美鬚髯便弓馬爲魏文帝
千牛備身周文奇之授平東將軍賜爵宜君縣子北芒之役
周師不利榮定帥精騎擊卻齊師以功拜上儀同尋進位開
府襲爵永富縣公除忠州刺史齊平加上開府拜前將軍伏
飛中大夫其妻隋文帝姊安成長公主也文帝少與契厚榮
定亦知帝有人君表尤相維結帝作相領左右宮伯常宿禁
中尉遲迥初平朝廷頗以山東爲意拜洛州總管以鎮之坐
事除名公主曰天子姊乃作田舍兒妻尋拜右武侯大將軍
上數幸其第恩錫甚厚以佐命功拜上柱國歷秦州總管突

厥寇邊爲行軍元帥出涼州戰於高越原兩軍相持地無水
士卒渴甚死者十二三榮定仰天太息俄而澍雨軍復振於
是進擊數挫其鋒突厥憚之請盟而去進爵安豐郡公復封
子憲爲安康郡公拜右武衛大將軍帝欲以爲三公固辭乃
止及卒帝爲之廢朝令左衛大將軍元旻監護喪事賜絹三
千匹贈冀州刺史陳國公謚曰懿子抗嗣抗美容儀性通率
長於巧思父卒後恩遇彌厚位定州刺史檢校幽州總管煬
帝卽位與漢王諒通謀除名弟慶襲封陳公慶亦有姿容性
和厚頗工草隸初封永富郡公位河東太守衛尉卿大業末
爲南郡太守弟璉亦工草隸頗解鐘律歷位隸川南郡扶風
太守

竇毅字天武熾兒子父岳早卒以毅勲追贈大將軍冀州刺

史毅深沉有器度事親以孝聞魏孝武初起家員外散騎侍郎齊神武擅朝毅慨然有殉主志從孝武西遷封奉高縣子禽賈泰復宏農戰沙苑皆有功進爵安武縣公周孝閔踐阼進爵神武郡公保定三年拜大將軍與齊爭衡並結突厥爲外援許納女於周齊主亦遣使求婚突厥欲有悔朝廷令楊荐等往返十餘方復前好至期往逆猶懼改圖以毅勲戚威重令爲使毅至齊使亦在突厥君臣有貳志毅抗言正色以大義責之卒以皇后歸別封成都縣公加上柱國爲大司馬隋開皇初拜定州總管累居藩鎮咸得人和二年薨於州贈襄郢等六州刺史謚曰肅毅性溫和謹慎自守尙周文帝第五女襄陽公主特爲朝廷所委信未嘗有矜惰之容子賢嗣賢字託賢志業通敏少知名宣政元年授使持節儀同大將

軍開皇中襲爵神武公除遷州刺史毅第二女卽唐高祖太
穆后武德元年詔贈毅司空使持節總管荆郢等十州諸軍
事荊州刺史杞國公

庫狄士文代人干孫性孤直雖親鄰莫與通在齊襲封章武
郡王位領軍將軍周武帝平齊閉門自守帝奇之授開府儀
同三司隨州刺史隋初加上開府封湖陂縣子尋拜貝州刺
史性清苦不受公料子嘗噉官廚餅枷於獄累白杖二百步
送還京僮隸無敢出入皆封署其門法令嚴肅吏人股戰
嘗入朝上賜公卿入左藏獨口銜絹一匹兩手各持一匹上
問之曰臣口手俱足餘無所須上異之別賞遺之時司馬京
兆韋焜清河令河東趙達並苛刻唯長史有惠政謠曰刺史
羅利政司馬蝮蛇頭長史含笑判清河生喫人上聞嘆曰士

文暴過毒獸坐免未幾爲雍州長史謂人曰我向法深不能
窺候貴要無乃必死此官及下車執法嚴不避貴戚坐從妹
事擊獄憤卒家無餘財

侯莫陳穎字遵道代人崇子也少有器量風神警發爲時輩
所推魏大統末以父功賜爵廣平侯累遷開府儀同三司從
滕王迥擊龍泉文城胡懸軍五百餘里破其三柵時詔胡厥
匿良人者誅沒其妻子有人言爲胡村所隱匿柱國豆盧勣
將誅之穎曰未若召其渠帥以隱匿者付之令自歸首勣從
之諸胡爭降附遷司武加振威中大夫隋初加上開府進昇
平郡公伐陳以行軍總管從秦王俊出魯山道渡江安集歸
附再遷瀛州刺史甚有惠政後免百姓送者莫不流涕因立
碑頌穎清德後拜邢州刺史仁壽中吏部尙書牛宏持節巡

撫山東以穎爲第一上優詔褒揚時妙簡清吏泣嶺南徵穎入朝進大將軍拜桂州總管十七州諸軍事大崇恩信人夷悅服煬帝初以兄芮事徵還後拜恒山太守時嶺南閩越多不附帝以穎爲南方所信服拜南海太守卒官謚曰定子虔會知名

達奚長儒字富仁代人祖俟魏定州刺史父慶驃騎大將軍儀同三司長儒少懷節操膽烈過人十五襲樂安公周太祖引爲親信以質直恭樸授大都督數有戰功從平齊遷上開府進安成郡公別封一子縣公後與烏丸軌圍陳將吳明徹於呂梁陳遣驍將劉景率勁勇七千來援長儒逆拒之取車輪數百繫以大石沈之清水連轂相次景軍至船艦礙輪不得進乃縱奇兵水陸俱發大破之獲明徹以功進大將軍尋

授行軍總管北巡沙塞卒與虜遇接戰大破之文帝作相王謙舉兵於蜀詔長儒擊破之隋初進上大將軍封蘄春郡公開皇二年突厥沙鉢略衆十餘萬南掠詔爲行軍總管率衆二千擊之遇於周槃衆寡不敵軍中大懼長儒慷慨神色愈烈爲寇所衝突散而復聚轉戰三日五兵咸盡士卒以拳毆之手皆骨見凡十四戰殺傷萬計虜氣奪乃解去長儒身被五創通中者二戰士死傷十八九突厥本欲大掠秦隴旣逢長儒兵皆力戰意大沮明日於戰處慟哭而去優詔加上柱國餘勲迴授一子戰亡將士皆贈官三轉世襲授長儒甯州刺史尋轉鄜州母憂去水漿不入口五日上嘉歎起爲夏州總管突厥憚之不敢窺塞以病免又除襄州總管在職二年轉蘭州總管涼原盛三總管皆受節度率衆出祁連山西至

蒲類海還轉荊州總管三十六州諸軍事高祖曰江陵要
害國之南門今以委公朕無慮也歲餘卒官諡曰威子嵩大
業時太僕少卿

慕容三藏紹宗子幼聰敏多武畧頗有父風武平初襲燕郡
公以軍功厯武衛大將軍周師入鄴齊後主東遁委三藏留
守鄴宮齊王公皆降三藏猶拒戰及齊平武帝引見恩禮甚
厚授儀同大將軍隋開皇元年授吳州刺史九年副襄陽公
韋洸討平嶺南洸卒詔檢校廣州道行軍事以功授大將軍
後遷廓州刺史人歌頌之文帝數有勞問又畜產繁滋獲醜
鬪奉獻寶物百段十三年州界連雲山響稱萬歲者三詔頒
郡國仍遣使醮山其日景雲浮於上雉兔馴壇側文帝大悅
改封河內縣男二厯疊州總管和州刺史淮南郡太守所在有

惠政改授金紫光祿大夫大業七十卒

房北代人剛毅有武畧開皇中爲邊將名顯當時嘗爲行軍

總管擊胡以功官至柱國徐州總管

以上大府

乞伏慧字令和馬邑鮮卑人祖周魏銀青光祿大夫父纂金
紫光祿大夫並第一領民酋長慧少慷慨便弓馬齊文襄時
爲行臺左丞加蕩寇將軍累遷右衛將軍太僕卿自永甯縣
公封宜民郡王與兄貴和一門二王稱貴顯周平齊授使持
節開府儀同大將軍拜伏飛右旅下大夫轉熊渠中大夫從
韋孝寬擊尉惇於武陟所當皆破授大將軍進柱國賜爵西
河郡公邑三千戶請以官爵讓兄不許論者義之隋初拜曹
州刺史曹民多姦隱戶口簿帳慧下車按察得戶數萬遷涼
州總管嚴烽燧遠斥堠突厥竟不入境轉齊州刺史得隱戶

數千遷壽州總管左轉杞州刺史在職數年遷徐州總管表
求致仕不許俄轉荊州總管又領潭桂總管三十一州諸軍
事俗輕剽躬行樸素見人以筮捕魚出絹買而放之百姓號
其處曰西河公筮轉秦州總管煬帝初爲天水太守大業五
年征吐谷渾坐道不整除名卒

以上朔平府

柳雄亮字信誠河東解人檜子檜見嘗年十四哀毀過禮有
復仇之志武帝時眾寶率其部歸長安帝待之甚厚雄亮手
斬眾寶於城中請罪闕下帝特原之後累遷內史中大夫賜
爵汝陽縣子隋初拜尚書考功侍郎遷給事黃門侍郎尚書
省奏事多所駁正俄檢校太子左庶子進爵伯秦王俊鎮隴
右出爲秦州總管府司馬領山南道行臺左丞卒子贊嗣
柳機字匡時解人慶之子也偉容儀有器局頗涉經史年十

九周武帝時爲魯公引爲記室及嗣位累遷太子宮尹封平齊縣公宣帝時爲御正上大夫屢諫不聽求出拜華州刺史周末徵還義形於色無所陳請俄拜衛州刺史隋初進爵建安郡公徵爲納言機性寬簡有雅望而無所損益又好飲酒不親細務數年出爲華州刺史尋轉冀州刺史後徵入朝以其子述尚主禮遇益隆初機在周與族人昂俱厯顯要至是竝爲外職上賜宴楊素戲曰二柳俱摧孤楊獨聳坐者歡笑機竟無言尋還州前後作守俱稱寬惠後徵還卒贈大將軍青州刺史謚簡子述嗣

柳述字業隆機子性明敏有幹略頗涉文藝蔭太子親衛尚蘭陵公主拜開府儀同三司內史侍郎上於諸壻中特見寵遇歲餘判兵部尚書事父艱尋起攝給事黃門侍郎龔建安

郡公仁壽中判吏部尙書事述雖職務修理爲當時所稱而
不達大體又無所降屈數於上前面折楊素短判事有不合
素意或令述改輒謂將命者曰語僕射道尙書不肯素銜之
拜兵部尙書參掌機密抗表陳讓命攝兵部與楊素黃門待
郎元巖等侍仁壽宮令述召房陵王述與元巖出外作敕書
素見之謀矯詔執述巖屬吏大業初除名謫龍川徙甯越病
卒

柳莊字思敬河東解人遐子也少有器量博覽墳籍兼善辭
令濟陽蔡大寶有重名於江左時爲岳陽王詒議見莊歎曰
襄陽水鏡復在於茲遂以女妻之然而嘗辟參軍累遷鴻臚
卿隋文帝輔政蕭歸令莊奉書入關文帝執莊手而別梁之
將帥咸請與尉遲迥連衡唯歸疑不可會莊至自長安申文

帝結託之意遂言曰今尉遲迥雖曰舊將昏耄已甚消難王謙常人之下者非有匡合之才況山東庸蜀從化日近周室之恩未洽於朝廷臣料之迥等終當覆滅隋公必遷周鼎未若保境息人以觀其變歸深以爲然未幾消難迥謙皆敗歸謂莊曰近若從衆言社稷已不守矣隋初莊又入朝帝深慰勉之及爲晉王廣納妃於梁莊因是往來四五反前後賜物數千段梁國廢授開府儀同三司除給事黃門侍郎莊明習舊章雅達政事凡所駁正帝莫不稱善蘇威重莊器識常奏云江南人有學業者多不習世務習世務者又無學業能兼之者不過柳莊高頴亦厚之同官陳茂心不平譖愬頗行尙書省嘗奏流罪奏曰法如是更重之是法不信於民心也而處以大辟莊據法執由是忤旨茂因奏莊不親監丸藥十一

年詔莊以行軍總管長史隨軍討徐璿璿平授饒州刺史甚有能名卒於官

柳旦河東解人宏弟也工騎射頗涉書籍仕周兵部下大夫以行軍長史從討王謙有功授儀同三司開皇元年加開府封新城縣男授掌設驛騎歷羅浙魯三州刺史竝有能名太業初拜龍川太守開設學校大變山洞風詔褒美之徵爲太常少卿攝判黃門侍郎事卒子熒河內郡掾

柳肅字匡仁旦弟少聰敏嫻於占對仕周宣納上士隋文帝作相引爲賓曹參軍開皇初授太子洗馬陳使謝泉來聘詔肅宴接時論稱其華辯歷太子內舍人遷僕射嘗諫曰但患不孝無患見疑劉臻鼓搖唇舌適相誑誤願勿納之後卒坐除名大業中事白召守禮部侍郎坐事免後守工部侍郎大

見親任幸遂嘗委涿郡留守卒官

柳謩之字公正解人父蔡年周順州刺史謩之身長七尺五寸儀容甚偉風神爽亮進止可觀兒時齊王憲遇於塗與語大奇之奏爲國子生以明經擢第拜宮師中士轉守廟下士武帝有事太廟謩之讀祝文音韵清雅觀者屬目上善之擢爲宣納上士隋開皇初拜通事舍人尋遷內史舍人歷兵部司勳二曹侍郎朝廷以謩之雅望善談讒又飲酒至一石不亂每陳使至輒令接對遷光祿少卿出入十餘年參掌敷奏宗女光化公主妻吐谷渾命兼散騎常侍送之復送義成公主於啟民前後得贈馬二千匹雜物稱是皆散之宗族家無餘財出爲肅息二州刺史俱有惠政大業初拜光祿啟民畜牧定襄馬邑間諭令出遣拜黃門侍郎齊王長史上法服臨

軒引譽之詣齊王所西面立宣勅謂曰我出藩之初從內送
王子相於我曰事無大小皆委之無得昵近小人疎遠子相
若與譽之從事一如子相也後竟坐除名及幸遼召檢校燕
郡事坐供頓戍嶺南卒子威明

柳昂字千里解人敏子也幼聰穎有器識幹局過人周武帝
時爲內史中大夫開府儀同三司賜爵文城郡公常途用事
百寮皆出其下昂竭誠獻替知無不爲謙虛未嘗驕物時論
重之宣帝疎昂然不離本職周末拜大宗伯隋加上開府拜
潞州刺史有惠政卒官

柳裘字茂和河東解人齊司空世隆之曾孫也祖惔梁尚書
左僕射父明太子舍人義興太守裘少聰慧弱冠有令名梁
歷尚書郎駙馬都尉遣請和於魏俄而江陵陷遂入關中周

明武間自麟趾學士累遷太子侍讀封昌樂縣侯除天官府都上士宣帝初拜儀同三司進爵公_轉御飾大夫留侍禁中與劉昉韋夔皇甫績同謀引高祖入總萬機裘進曰宜早定大計如更遷延恐貽後悔從之進上開府拜內史大夫委以機密令往喻并州總管李穆盛陳利害穆遂歸心又令喻司馬消難未到而消難奔陳卽令隨便安集淮南賜馬及雜物開皇元年進大將軍拜許州刺史在官清簡吏民懷之復轉曹州刺史其後上思裘問曰曹州刺史何當入朝或對曰卽今冬也裘尋卒爲傷惜者久之謚安子惠童嗣_{以上解州}

裴仁基字德本河東人祖伯鳳周汾州刺史父定上儀同仁基少驍武便弓馬伐陳以親衛從先登陷陣拜儀同賜物千段領漢王諒府親信諒起兵仁基苦諫見囚諒敗超拜護軍

改授武賁郎將從李景討蠻向思多於黔安以功進銀青光祿大夫擊破吐谷渾加金紫光祿大夫獲寇掠鞞拜左光祿大夫從征高麗進光祿大夫李密據洛口令爲河南道討捕大使據武牢所得軍資卽用分賞監軍御史蕭懷靜持仁基長短仁基懼殺懷靜歸密密以爲河東郡公子行儼驍勇善戰復以爲絳郡公王世充詣偃師求決戰仁基曰世充盡銳而至洛下必虛可分兵守其要路令不得東簡精兵三萬徬河西出以逼東都世充卻還我且按甲世充重出我又逼之如此則我有餘力彼勞奔命兵法所謂彼出我歸彼歸我出數戰以疲之多方以誤之者也密諸將皆請戰仁基苦爭不得戰遂大敗後爲世充所殺

裴存叔業五世孫始自開喜徙稷山大業中爲淮安司戶參

軍洩政仁愛賊不忍害護送還鄉

裴文安聞喜人仁壽中爲漢王諒總管府兵曹諒起兵文安說諒曰井陘以西是王掌握之內山東土馬亦爲我有宜悉發之分遣羸兵守要路仍令隨方略地率其精銳直入蒲津文安請爲前鋒王以大軍繼後風行電掣頓於灞上咸陽以東可指揮而定關中兵不暇集羣情離駭我卽陳兵號令誰敢不從旬日之間事可定矣諒大悅署文安爲柱國如其計部署諸將未至蒲津百餘里諒忽改圖令紇單貴斷河橋守蒲州而召文安文安至曰兵機詭速本欲出其不意王旣不行文安又退使彼計成大事去矣未幾煬帝使楊素將兵擊諒諒敗降於素

以上絳州

宇文述字伯述代武川人本姓破野頭父盛周上柱國述少

驍銳便弓馬周武帝時以武功拜開府大冢宰宇文護愛之
領親信召爲左宮伯累遷英果中大夫賜爵博陵郡公尋改
濮陽隋高祖爲相以行軍總管率步騎三千從韋孝寬至河
陽平尉遲迥每戰有功超拜上柱國進褒國公賜縑三千匹
開皇初拜右衛大將軍伐陳以行軍總管率衆三萬自六合
濟時韓擒虎賀若弼兩軍趣丹陽迺進據石頭以爲聲援蕭
巖蕭巖據東吳迺領行軍總管元契張黶言等伐之水陸兼
進巖立柵晉陵城東又絕塘道而自義興入大湖掩迺後迺
進破其柵迺兵擊敗巖斬巖司馬曹勒進至奉公埭蕭巖陳
君範以會稽降吳會悉平賜一子開府物三千段拜安州總
管晉王廣奏爲壽州刺史總管及爲皇太子以迺爲左衛率
大業初拜左衛大將軍改許國公二年加開府儀同三司冬

正朝會給鼓吹一部從幸榆林吐谷渾遣使請降令述以兵屯西平之臨羌城撫納降附吐谷渾西遯述領鷹揚郎將梁元禮張峻崔師等追至曼頭城攻拔之斬三千餘級乘勝至赤水城復拔之其餘黨走屯邱尼川進擊大破之獲王公尙書將軍二百人前後虜男女四千口渾主南走雪山故地皆空上大悅明年從西幸登燕支每爲斥候渾賊復寇張掖進擊走之還至江都宮敕與蘇威常典選舉參預朝政述時貴重委任與蘇威等而親愛過之言無不從寵遇當時莫與爲比及征高麗爲扶餘道軍將與九軍至鴨綠水乙支文德來詣營述緩縱文德逃歸遂度水道之一日中七戰皆捷東濟薩水去平壤城三十里因山爲營文德復遣使僞降述因其詐而遣衆半濟賊擊後軍軍大潰不可禁止九軍敗績初軍

三十萬五千人及還唯二千七百人除名爲民明年從東征復官爵班師令馳驛赴河陽發諸郡兵以討楊元感元感西逐將圖關中述躡至閩鄉皇天原與來護兒列陣當其前遣突厥通以奇兵擊其後大破之遂斬元感賜物數千段復從東征至懷遠而還卒於江都廢朝贈司徒尙書令十郡太守班劍四十人輜輶車前後部鼓吹謚曰恭祭以太牢

宇文慶字神慶神舉弟沈深有器局少以聰敏見知受業東觀頗涉經史旣而曰書足記姓名而已安能久事筆硯爲腐儒業乎文州賊亂慶從征以功授都督衛王直鎮山南引爲左右慶善射有膽氣好格猛獸直壯之遷車騎大將軍儀同三司預誅宇文護進授驃騎大將軍加開府從攻河陰先登攀堞與賊短兵接中石乃墜絕而後蘇帝勞之曰卿勇可以

賈人也復從拔晉州齊兵大至慶與齊王憲卒與賊窘憲挺身而遁慶退據汾橋賊爭進慶射之所中人馬必倒賊乃稍卻拔高壁克并州下信都禽高潛功竝居最進大將軍封汝南郡公尋以行軍總管擊延安胡平之厯延甯二州總管隋文爲丞相以行軍總管征江表以勞進上大將軍帝與慶有舊甚見親待令督丞相軍事委以心腹尋加柱國開皇初拜左武衛將軍進上柱國數年除涼州總管歲餘徵還加以優禮卒於家子靜亂尙隋文女廣平公主位儀同安德縣公熊州刺史先慶卒協位右翊衛將軍字及化及之亂遇害

王誼字宜君代武川人父顯周鳳川刺史誼少有大志便弓馬博覽羣言閔帝時爲左中侍上士晉公護執政帝拱默無所關預有朝於帝者微不恭誼勃然進擊之朝臣無敢不肅

遷御正大夫父艱毀葬過禮廬墓側負土成墳武帝卽位遷
內史大夫封楊國公齊平自相州刺史徵爲大內史汾州稽
胡亂帝弟越王盛譙王儉爲總管竝受誼節度擊平之封一
子開國公受遺詔輔政宣帝卽位憚誼剛正出爲襄州總管
隋文爲丞相時卽洛多難誼分兵討之旬月皆平遣使勞問
冠蓋不絕以第五女妻其子奉孝拜大司徒誼自以與帝有
舊亦歸心焉隋受禪顧遇彌厚奉使突厥稱旨進郢國公子
奉孝卒踰年誼表請公主除服爲御史大夫楊素所劾詔不
問然恩禮稍薄有告誼謀反者帝案其事無實賜酒釋之尋
以罪賜死

杜彥雲中人父遷徙幽彥勇果善騎射仕周左侍上士後從
陸通擊陳將吳明徹於土州破之又擊砮蠻克倉埵白楊二

柵斬渠帥進平郢州賊帥樊志拜大都督尋遷儀同治隆州
郡事復拜隴州刺史賜爵永安縣伯從韋孝寬擊尉遲迥每
戰有功進上開府改襄武縣侯拜魏郡太守開皇初授丹州
刺史進爵公伐陳爲行軍總管軍至南陵敵屯據江岸彥遣
儀同樊子蓋率精兵擊破其柵獲船六百餘艘度江擊南陵
城拔之擒其守將許翼進至新林與韓擒虎合軍陳平賜物
五千段粟六千石進柱國賜子寶安爵昌陽縣公高智慧亂
復以行軍總管從楊素討之別解江州圍智慧餘黨聚溪洞
彥水陸兼進攻錦山陽父若石壁四洞悉斬渠帥復擊斬賊
李隨于彭山擊平徐州宜豐二洞賜奴婢百餘口拜洪州總
管甚有治名歲餘上曰吾思可以鎮榆林代賀婁子幹者莫
過杜彥徵拜雲州總管突厥來寇輒擒斬之遂不敢至塞後

數年錄前功賜子寶虔爵承縣公十八年征高麗以行軍總管從漢王至營州令總統五十營事及還拜朔州總管以彥素爲突厥所憚復拜雲州總管尋因疾徵還卒年六十寶虔大業末爲文城郡丞

獨孤羅字羅仁武川人信長子爲高氏所囚後寓居中山孤貧無以自給信入關娶二妻郭氏生子六善穆藏順陔整崔氏生隋獻皇后及齊亡隋文帝爲定州總管獻皇后遣求羅得之周武帝以羅功臣子徵拜楚安郡太守文帝爲丞相拜儀同隋初追贈羅父后曰羅誠嫡長不可誣也於是龔趙國公以弟善爲河內郡公穆金泉縣公藏武平縣公陔武喜縣公整千牛備身擢羅左領將軍遷左衛將軍前後賞賜不可勝計出爲涼州總管進上柱國徵拜左武衛大將軍煬帝改

封蜀國公卒諡恭子纂嗣河陽郡都尉纂弟武都亦爲河陽都尉庶長子開遠大業末爲千牛與獨孤盛力戰閣下爲賊所執賊義而捨之

閻毗榆林盛樂人祖進魏本郡太守父慶周上柱國甯州總管毗七歲襲爵石保縣公邑千戶及長儀貌矜嚴頗好經史受漢書於蕭該略通大旨工篆草隸尤精畫周武帝悅之命向清都公主宣帝初拜儀同三司授千牛左右隋初以技藝侍東宮甚見親待尋拜車騎上嘗造高頰大闕於龍臺澤唯毗一軍法制肅然賜帛俄兼宗衛率長史加上儀同後坐配大業初以毗性巧諳練舊事詔典軍器尋授朝請郎毗立議輦輅車輿多所增損擢起部郎長城之役毗總其事有事恒岳詔營立壇場尋轉殿內丞從幸張掖郡持節迎勞高昌王

母憂尋起令視事自洛口開渠達於涿郡以通運漕毗督其
役明年兼領右朔衛長史營建臨朔宮征高麗領武賁郎將
典宿衛拜朝請大夫遷殿內少監又領將作少監事率騎二
千追斛斯政政據高麗柏崖城攻二日徵還卒年五十贈殿
內監以上歸
緩道

右隋三十人

劉義節本名世龍并州人隋大業末補晉陽鄉長富於財妻
寂薦之唐公又與王威高君雅游然於唐公爲最厚兵將起
威君雅疑之義節刺知其情得先事擒威等從平關中爲鴻
臚卿時急軍賞義節曰今京師屯兵多樵貴帛賤若伐街苑
樹爲薪以易市帛歲數十萬可致又請取藏內見繪得十餘
萬段調度遂給遷太府封葛國公賜今名貞觀初轉少府坐

事徙嶺南終欽州別駕

許世緒并州人隋鷹揚府司馬勸唐公收取英俊成帝王之業唐公顧倚親密兵起授右一府司馬累除蔡州刺史正定郡公卒弟洛仁亦從起晉陽錄功至冠軍大將軍卒贈代州都督謚勇陪葬昭陵

秦行師并州人武德初以從龍功封清水郡公拜左監門將軍

龐卿惲并州人從起太原後討建成有功拜右驍衛將軍邾國公卒追改濮國子同善右金吾大將軍子承宗開元初仕至太子賓客

武士逸字述文水人有戰功爲齊王府戶曹參軍封六安縣公從齊王守太原爲劉武周所執嘗間遣人陳破賊策賊平

擢益州行臺左丞數言當世得失高祖嘉納之終韶州刺史張楚金并州祁人有至行與兄越石皆舉進士州欲獨薦之固辭請俱罷都督李勣歎曰士求才行者也既能讓何嫌皆取乎乃並薦之累進刑部侍郎儀鳳初彗見上疏陳得失高宗欽納賜物二百段武后時歷秋官尚書爵南陽侯有清概李彭文水人橙子擢明經第天寶中選名臣子可用者自咸甯丞遷右補闕從入蜀後橙數年卒孫景讓景莊景温

白志貞本名琇珪太原人事節度使李光弼硜硜自力有智數光弼善之使與帳下議擢累司農卿十官德宗以爲敏遂倚腹心進授神策軍使賜今名有所建白言無不從從狩奉天爲行在都知兵馬使抑李懷光不使朝貶恩州司馬稍徙閩州別駕貞元二年爲果州刺史明年拜浙西觀察使卒

於官

王重盈祁人重榮兄軍中號毅武歷汾州刺史黃巢度淮擢陝虢觀察使重榮據河中三遷檢校尙書右僕射卽拜節度使尋同中書門下平章事重榮爲部將常行儒所害軍中推立重盈留長子珙領陝虢節度使入殺行儒軍復安昭宗立進太傅兼中書令封琅琊郡王父子兄弟相繼帥守而從子蘊亦歷官忠武節度使乾甯二年卒

王重榮太原祁人父縱太和末爲河中騎將從石雄破回鶻終鹽州刺史重榮以父任爲列校與兄重盈皆以毅武冠軍擢河中牙將主呵察時兩軍士干夜禁捕而鞭之中尉楊元實怒執重榮答曰夜半執者姦盜孰知爪士具言其狀元實更令府擢右署重榮多權詭衆所嚴憚雖主帥莫不下之稍

遷行軍司馬黃巢分兵略蒲節度使李都不能支欲降然內
憚重榮表以自副重榮脇說都曰我所詭謀紆難以外援未
至今賊哀責曰急又收吾兵以困我則亡無日矣請絕橋嬰
城自守不然變生何以制之都曰願以節假公遂奔行在重
榮乃悉驅出賊使斬之上使前京兆尹竇滂問道慰其軍因
詔代都重榮遂主留後賊使朱溫以舟師下馮翊黃鄴自華
陰合攻重榮重榮感勵士眾遂大戰敗之賊棄糧仗四十餘
艘卽拜檢校工部尙書爲節度使重榮與武功楊復光連和
擊賊將李詳於華州執以徇賊使尙讓來攻朱溫將勁兵居
前敗重榮兵於西關門遂出兵夏陽掠河中漕米數十艘重
榮選兵三萬攻溫溫懼悉鑿舟沈於河遂舉同州降重榮表
爲同華節度使有詔卽副河中行營招討賜名全忠巢喪二

川怒甚自將精兵數萬壁梁田重榮軍華陰復光軍渭北特
角攻之賊大敗執其將趙璋巢中流矢走重榮兵亦死耗相
當懼巢復振與復光計乃遣使約李克用連和克用使陳景
思總兵自嵐石赴河中親率師從之遂平巢復長安以功檢
校太尉同中書門下平章事封琅琊郡王累加檢校太傅中
人田令孜建請二池領屬鹽鐵重榮不聽令孜徙重榮充海
節度使以王處存代之詔克用將兵援河中重榮上書劾令
孜離間方鎮令孜遣邠甯朱玫進討璧沙苑重榮遣克用書
且言奉密詔須公到使我圖公此令孜朱全忠朱玫謀也因
示偽詔克用遂合河中兵戰沙苑玫大敗俄有嗣襄王愠之
變重榮不受命與克用謀定王室楊復恭遣諫議大夫劉崇
望齋詔諭意克用重榮聽命獻縑十萬願討玫重榮遂斬愠

長安復平重榮嘗辱部將常行儒行儒怨之光啟三年引兵
夜攻府重榮亡出外詰旦遇害

王珂重榮兄重簡子出繼重榮重盈卒軍中推爲留後李克
用薦之許嗣鎮三鎮兵起詔珂會克用以兵趨新平又爲邠
甯糧料使上旣還加檢校司空爲節度使克用以女妻之珂
親迎太原以李嗣昭助守河中朱全忠擊楊行密珂與太原
鎮定等道請加行密都統以討全忠全忠怨之劉季述之變
珂憤見顏色屢陳討賊謀旣反正首獻方物上甚倚之及李
克用兵折全忠乃謂其將張存敬曰珂恃太原侮慢我爾持
一繩縛之存敬襲克絳晉以何細皮之進攻珂全忠率師繼
進珂乞師太原爲網所迫不能進珂窮蹙會橋毀潛具舟將
遁夜諭守兵無有爲用者牙將劉訓言宜行成以緩敵珂然

之遺兄璘與諸將樊洪見存敬敬解圍而戍以兵全忠王出也始事重榮約爲甥舅指日月曰我得志凡王氏者皆事之至是自洛至過重榮墓僞哭而祭次虞鄉珂欲面縛牽羊以見全忠報曰舅之恩無日可忘君若以面縛禮見黃泉其謂我何珂出迎握手泣下駢轡以入居旬日舉珂室徙於汴後令人覲遣人賊之於華州自重榮傳珂凡二十年

郝忠榆次人舊志稱其文可經國武可濟時珪璋之器無玷無瑕敵愾之心有謀有勇官至明經宿衛昭武校尉上桂國

索自通字德之清源人爲方鎮有戰功

以上太原府

王修福字修福晉州人曾祖暹隋潞州司馬祖忻唐鄭州別駕父朗擢明經修福弱冠有敏捷之致學騎射妙絕時人由宿衛授慶州永業府右果毅應舉及第轉歧州洛邑府左果

毅先天元年御史大夫李傑奏修福清謹過人授本府折衝
賜緋魚袋定州嶽嶺軍副使鎮守北嶽廓清邊朔開元四年
卒子景珍右領軍衛景陽亦官翊衛

裴泰其先聞喜人澧州刺史懷感子由刺史累官中書令後
徙沃之大李村居鄉謙謹無貴顯態休休之度此其一斑云

以上平陽府

盧簡辭字子策河東蒲人綸子第進士歷佐帥府入遷侍御
史習知法令及臺閣舊事實歷中黎幹子熲諭臺請復葉縣
故田有司莫能知簡辭獨詰曰按幹坐黨魚朝恩誅貲田皆
沒大歷後數十年比有赦令無原洗之言熲安得冒論不爲
治福建鹽鐵院官盧昂坐贓簡辭窮案乃得金牀瑟瑟枕大
如斗敬宗曰禁中無此昂爲吏可知矣李程鎮太原表爲節

度判官入授考功員外郎累擢湖南浙西觀察使以檢校工部尚書爲忠武節度使徙山南東道坐事貶衢州刺史卒馬存亮字季明河中人元和時累擢左神策軍副使左監門衛將軍知內侍省事進左神策中尉軍所籍凡十餘萬存亮料柬尤精伍無罷士部無冗員敬宗初張韶蘇元明之變將幸右神策或曰不如入左軍近且速從之初右軍中尉梁守謙有寵至是存亮出迎捧足負而入以五百騎往迎二太后遣左神策大將軍康藝全等率騎兵討賊日暮射韶及元明皆死賜實封戶二百時存亮功最高乃推委權勢求監淮南軍代還爲內飛龍使太和中以右領軍衛上將軍致仕封岐國公卒贈揚州大都督存亮逮事德宗更六朝資端畏善訓士始去禁衛衆皆泣唐世中人以忠謹稱者唯存亮西門季

元嚴遵美三人而已

以上蒲州府

王姓潞州壺關人祖游齊定遠將軍荊州刺史七州諸軍事父貴隋朝散大夫揚州別駕姓初官武城令儀鳳二年遷武連令有惠政墓志稱其蝗越謠彰雉馴風著云云年八十二卒於家

以上潞安府

李克讓沙陀部入晉王克用弟也少善騎射爲振武軍校從討王仙芝以功拜金吾衛將軍留京師李氏以部族歸唐嘗遣二子宿衛賜第親仁坊其後克用起兵唐遣王處存以兵圍親仁坊捕之克讓與僕何相温石的厯等十餘騎彎弧躍馬突圍而出處存以千餘人追至渭橋克讓等射殺百餘人追兵乃止克讓奔於雁門明年克用復歸唐克讓遣宿衛京師黃巢犯長安克讓守潼關爲賊所敗奔於南山匿佛寺被

殺以上大

同府

李師行上黨武鄉人父甯前鄉縣令有惠政師行歷官延州

司馬亦有聲稱年八十一卒

以上

王君廓并州石艾人大業末聚兵掠夏縣虞鄉間歸李密密不甚禮乃歸國授上柱國假河南太守常山郡公遷遼州刺史徙封上谷從戰東郡有功爲右武衛將軍詔勞之曰爾以十三人被賊萬自古以少制衆無有也賜雜綵百段別下轅轅羅川二縣破世充將魏隱擊糧道緱氏沈米艘三十柁進爵彭國公鎮幽州擊突厥俘斬二千獲馬五千匹入朝帝賜所乘馬令自廷中乘以出謂侍臣曰昔藺相如叱秦王目皆皆裂君廓往擊建德李勣遇之至發憤大呼鼻耳皆流血其勇何特古人哉朕當不以例賞乃賜錦袍金帶還幽州會大

都督廬江王瑗欲奪君廓兵以委王詵君廓從數騎候詵留騎於外曰聞呼聲則入乃獨款詵詐曰有急變當白詵方沐握髮出卽斬之因執瑗以功授幽州都督瑗家口悉賜之進左光祿大夫賜帛千段居官不守法度長吏李元道數以法繩督猜惑不自安會被召至渭南殺驛吏亡奔野人殺之上顧前功爲收葬待其家如初

以上平定州

柳檢字道約河東解人祖元璋魏司州大中正相華二州刺史父裕周聞喜令儉有局量立行清苦爲州里所敬仕周宣納上士畿伯大夫隋初擢拜水部侍郎封率道縣伯尋爲廣漢太守甚有能名擢拜蓬州刺史訟者庭決遣之獄無繫囚蜀王秀時鎮益州列上其事遷邛州刺史在職十餘年人夷悅服後坐秀免妻子衣食不贖人咸歎伏大業初徵之時牧

州領郡並帶戎資唯儉起自良吏上嘉其績特授朝散大夫
拜宏化太守清節愈勵五年入朝郡國畢集上謂納言蘇威
吏部尚書牛宏曰其中清名天下第一者爲誰威等以儉對
又問其次威以涿郡贊務郭絢潁川贊務敬肅二人對賜儉
帛二百匹絢肅各一百匹令朝集使送至郡邸以旌異焉論
者美之及大業末撫結人夷卒無離叛竟以保全恭帝時與
留守李粲縞素於州南前慟哭旣而歸京拜上大將軍歲餘
卒年八十九

張騰芮城人仕桃林令永瀆元年卒年八十六葬後光宅元
年其子武智與姪寶藏行墓側見騰衣冠整肅從侍二人良
久方失武智等號攀墓及乃刻石爲像日供奉之石像今尙

存
以上
解州

右唐二十一人

張源德晉人從李罕之入梁自金吾衛將軍爲蔡州刺史梁
貞明三年分魏相等六州爲兩鎮懼魏軍不從乃遣劉鄩將
兵萬人屯於衛以虞變魏軍果叛迫節度使賀德倫以魏博
降晉時源德爲鄆守貝州晉王入衛先襲破德州乃以兵五
千攻貝源德堅守不下晉軍壅而圍之已而劉鄩大敗於故
元城南走黎陽晉軍攻破洺州而衛邢磁相槍或降或棄城
走當此時晉已先下全燕而鎮定皆附於晉自河以北山以
東四面千里六鎮數十州之地皆歸晉獨貝一州圍之踰年
不可下源德守既堅而貝人聞晉已盡有河北城中食且盡
乃勸源德出降源德不從遂見殺

相里金字奉金并州人也勇悍而折節下士爲五院軍隊長

感柏鄉胡柳皆有功遷黃甲指揮使同光中拜忻州刺史時諸州皆以部曲主場務漁蠶公私金獨禁部曲不與事遷權州防禦使廢帝起兵鳳翔首遣判官薛文遇往來計事廢帝初拜保儀軍節度使晉高祖起兵爲太原四面步軍指揮使晉初徙鎮建雄罷爲上將軍天福五年卒贈太師

王權字秀山太原人唐左僕射起之曾孫父堯官至右司郎中權舉進士爲右補闕唐亡事梁爲職方員外郎知制誥翰林學士累遷御史中丞唐莊宗滅梁貶隨州司馬起爲右庶子累遷戶部尙書晉高祖時爲兵部尙書當奉使於遼歎曰我雖不才安能稽顙於穹廬乎因辭不行坐是停任踰年以太子少傅致仕卒年七十八贈左僕射

以上太原府

王瓚河中人重榮諸子事梁爲諸衛大將軍秦甯鎮國軍節

度使末帝時爲開封尹貞明五年代賀瓌爲北面行營招討使自黎陽渡河攻澶州不克退屯楊村扼河上流與晉人相持經年大小百餘戰卒無功代還復開封尹唐兵過宛胸環驅率市人登城拒守及攻封邱門環開門迎降莊宗勞而起之曰朕與卿家世婚姻然人臣各爲其主耳復何罪因以爲開封尹遷宣武軍節度使已而以憂卒贈太子太師

楊彥詢字成章河中寶鼎人少事青州王師範師範聚書萬卷使彥詢掌之以聽悟見親信師範降梁乃之魏事楊師厚爲客將魏博八晉因留事晉爲引進副使奉使吳蜀常稱旨歷德州刺史羽林將軍晉高祖鎮太原以彥詢爲太原節度副使後欲拒命彥詢不敢正言因曰太原之力能與唐敵否公其審計之高祖左右以彥詢異議欲殺之高祖遽止之曰

惟副使一人我自保之乃免爲宣徽使數往來遼帳中遼太宗愛其爲人明年拜感德軍節度使復入爲宣徽使又拜安國軍節度使天福七年徙鎮鎮國遭歲大饑爲政有惠愛罷爲右金吾衛上將軍卒年七十四贈太子太師

盧文紀字子持祖簡求唐太原節度使父嗣業右補闕文紀舉進士事梁爲刑部侍郎集賢殿學士唐明宗時爲御史中丞初上事諸道進奏官賀文紀據牀端笏臺吏通名贊拜請悉復中外官校考法將相天子自書之詔雖施行而官卒不考遷工部尚書貶石州司馬久之爲祕書監太常卿奉使於蜀過鳳翔時廢帝爲鳳翔節度使文紀爲人形貌魁偉語音琅然廢帝奇之後入立欲擇宰相左右皆言文紀及姚顛有人望廢帝因悉書清望官姓名內琉璃瓶中夜焚香祝天以

筋骸之首得文紀欣然相之拜中書侍郎同中書門下平章
請罷五日起居復唐故事開延英翼得從容奏議天下事因
詔宰相有事不以時詣閣門請對及北征至河陽勸帝扼橋
自守不聽晉初罷爲吏部尙書累遷太子太保致仕周初拜
司空於家卒年七十六贈司徒以上蒲州府

李建崇上黨人少從軍善騎射歷後唐晉漢皆有戰功累官
右衛大將軍周太祖卽位授右監門大將軍

常思字克恭潞州人初爲唐長劍指揮使歷唐晉爲六軍都
虞侯漢高祖鎮河東以思爲牢城指揮使高祖立領武勝軍
節度使徙鎮昭義初思微時周太祖方少孤無依衣食於思
家以思爲叔後思與周太祖遭漢以取富貴周太祖已卽位
每呼思爲常叔拜其妻如家人禮廣順三年徙鎮歸德居三

年來朝又徙平盧踰年疾歸洛陽卒贈中書令

張彥威潞州人仕周歷金吾衛上將軍初爲劉知遠行軍司馬軍中推知遠爲主知遠謙讓彥威三上箋勸進郭威與楊

邠贊之遂卽位

以上潞安府

康延孝代北人爲太原軍卒亡命於梁爲左右先鋒指揮使復以百騎奔於唐莊宗解御衣金帶以賜之拜博州刺史捧日軍使兼南面招討指揮使莊宗屏人問延孝梁事延孝具言末帝懦弱趙巖壻也張漢傑婦家皆用事段凝姦邪以入金多爲大將自其父時故將皆出其下王彥章驍將也遣漢傑監其軍而制之小人進任而忠臣勇士皆見疏斥此其必亡之勢也莊宗又問梁計如何曰竊聞梁且大舉莊宗曰何以禦之延孝曰梁兵雖衆分則無餘請待其旣分以鐵騎五

千自鄆趨汴出其不意擣其空虛不旬日天下定矣莊宗甚壯其言後梁雖不出兵而梁兵悉屬段凝於河上京師無備莊宗卒用延孝策自鄆入汴凡八日而滅梁以功拜鄭州防禦使賜姓名曰李紹琛二年遷保義軍節度使三年征蜀爲先鋒排陣斬使破鳳州取固鎮降興州與王衍戰三泉衍敗走斷吉柏江浮橋延孝造舟以渡進取綿州衍復斷綿江浮橋延孝謂招撫使李嚴曰吾遠軍千里入人之國利在速戰乘行破膽之時但得百騎過鹿頭關彼將迎降不暇若修繕橋梁必留數日使行得閉關爲備則勝負未可知也因與嚴乘馬浮江軍士隨之濟者千餘人遂入鹿頭關下漢州行弟宗弼果以蜀降蜀平延孝功爲多明年郭崇韜死魏王繼岌班師命延孝以萬二千人爲殿行至武連聞朱友謙無罪

見殺詔殺其子令德於遂州繼岌不遣延孝而遣董璋延孝與璋有隙已自疑及璋過延孝軍又不謁延孝大怒遂擁其衆自劍州返入蜀自稱西川節度三州制置等使馳檄蜀人數日衆至五萬繼岌遣任圜以七千騎追之及於漢州會孟知祥夾攻之延孝戰敗被擒知祥酌大卮從檻車中間之延孝曰郭崇韜佐命之臣功在第一兵不血刃而取兩川一旦無罪闔門受戮顧如延孝何保首領以此不敢歸朝耳至鳳翔遣宦者殺之

李從璋字子良應州人明宗姪也少善騎射莊宗時將兵戍常山聞明宗兵變於魏亦起兵據邢州明宗卽位爲捧聖左廂都指揮使改皇城使領饒州刺史拜彰國軍節度使徙鎮義成明宗幸汴州從璋欲率民貢獻坐罷爲右驍衛上將軍

居久之出鎮保義徙河中長興四年夏封洋王晉初徙鎮威
勝降封隴西郡公從璋鎮保義始折節自修在南陽頗有遺
愛天福二年卒年五十一子重俊虢州刺史以上大府

安重榮朔州人善騎射晉高祖卽位拜成德軍節度使重榮
雖武夫而曉吏事子德裕字燕之性介潔博貫羣史精於禮
傳宋初舉進士甲科累官金部郎中出知睦州還判太府寺
有集四十卷以上朔平府

王建立遼州榆社人唐明宗爲代州刺史以爲虞侯將莊宗
嘗遣女奴之代州祭墓女奴侵擾代人建立捕笞之莊宗怒
欲殺之明宗爲庇護之乃免明宗自魏而南曹皇后王叔妃
皆在常山建立殺常山監軍并其守兵明宗家屬得無恙由
是益愛之明宗卽位爲成德軍節度使尋拜節度使檢校太

尉同中書門下平章事建立與安重誨素不叶重誨言建立
通王都明宗不欲傷建立亟召還京師建立入見亦多言重
誨過失乃以建立爲右僕射同中書門下平章事判三司事
居歲餘自言不識文字願解三司久之出爲平盧軍節度使
又徙上黨建立求解職以太子少保致仕廢帝立復起爲天
平軍節度使晉高祖時徙鎮平盧天福五年來朝高祖勞之
曰三十年前老兄可毋拜賜以肩輿入朝給二宦者掖而升
殿宴見甚渥又徙昭義賜以玉斧蜀馬累封韓王建立晚節
戒殺生所至人稍安之

以上
邈州

扈彥珂代州雁門人幼事王建立以謹厚稱晉天福中建立
遣表薦彥珂得補河東節度使都押衙漢初擢宣徽南院使
尋授鎮國軍節度華商等州觀察處置使乾祐初周祖總兵

征三叛道出華州時議多以先討王景崇趙思綰爲便周祖
意未決彥珂曰三叛連衡推李守貞爲主宜先擊河中河中
平則永興鳳翔失勢矣今舍近圖遠若景崇思綰逆戰於前
守貞兵其後腹背受敵爲之奈何周祖從其言及平河中
以功遷護國軍節度朝議少其暗弱廣順初就加同平章事移
鎮滑州歲餘代歸請開宴不納以滑州李守貞宅賜之世宗
賜左衛上將軍顯德三年授開府儀同三司太子太師致仕
歸西京宋初就賜器幣數月卒年七十五

安彥威字國俊代州崞縣人少隸唐明宗麾下善射頗知兵
法明宗出鎮常爲牙將以謹厚見信及秦王從榮鎮鄴爲護
聖指揮使從榮判六軍遷捧聖指揮使領甯國軍節度使晉
高祖立拜北京留守徙鎮歸德時河決滑州命塞之彥威出

私錢募民治隄遷西京留守歲大饑賑撫饑民犯法者皆寬貸之饑民不忍流去母憂哀毀過制出帝時拜北面行營副都統悉出家財佐軍用以疾卒彥威與安太妣同宗出帝事爲舅彥威未嘗自言及卒太妣臨哭人始知其同宗也當時益稱其慎重

以上代州

裴迪字昇之河東聞喜人爲人明敏善治財賦精於簿書唐司空裴瓌判度支辟出使巡官都統王鐸鎮滑州奏汴宋鄆等州供軍院使鐸爲租庸使辟租庸使梁太祖鎮宣武辟節度判官太祖用兵四方常留迪以調兵賦太祖西攻岐王師範謀襲汴遣健卒苗公立持書至汴陰訶虛實迪召公立問東事公立色動乃屏人密詰之具得其事迪不暇啟遣朱友弼以兵巡兗鄆以故師範雖竊發而事卒不成太祖自

岐還將吏皆賜迎鑾叶贊功臣目迪曰叶贊之功惟裴公有
之他人不足當也迪入唐累遷太常卿太祖卽位拜右僕射
居一歲以司空致仕卒

裴羽字用化父贊相唐僖宗官至司空羽爲河南壽安尉事
梁爲御史臺主簿改監察御史唐明宗時爲吏部郎中與右
散騎常侍陸崇使於閩海風飄至錢塘被留經歲崇疾卒後
鏐遣羽還羽求載崇尸與俱歸鏐初不許羽以語感動鏐鏐
惻然許之因附羽表自歸由是吳越復通於中國羽護崇喪
至京師及其槨裝還其家士人皆多羽之義周太祖時爲左
散騎常侍卒贈戶部尙書

裴暉字司東河東聞喜人裴氏世爲名族暉容止端秀性剛
急直而無隱少好學唐光化中舉進士爲校書郎拾遺補闕

事梁爲翰林學士中書舍人事後唐爲禮部侍郎皞喜論議
每陳朝廷闕失多斥權臣改太子賓客以老拜兵部尙書致
仕晉高祖時起爲工部尙書復以老告拜右僕射致仕卒年
八十五贈太子太保皞以文學在朝廷久宰相馬尹孫桑維
翰皆皞禮部所放進士也後尹孫知舉引新進士詣皞皞喜
作詩曰門生門下見門生世傳以爲榮維翰作相嘗過皞皞
不迎不送人問之皞曰我見桑公於中書庶寮也桑公見我
於私第門生也何迎送之有人亦以爲當

以上絳州

右五代十八人

山西通志卷一百四十六

山西通志卷一百四十六 仕實錄二

三